

Majus opus nuper tentatum audivimus ipsi,
Tanto majus opus, quantum nostra æquora vincit
Oceani pelagus; tanto præclarius, ingens
Quantum America suis cum regnis omnibus, atque
Omni auro pretium hoc excedit velleris aureum.

Tertia pergelidæ pars terræ subjacet Uræ:
Ultimaque Arctoæ contraria nomen ab Austro
Sortita est: nobis sed vix nota utraque propter
Æternas hyemes, ventorumque invia regna.
Qua latè in Boreas America extenditur oras,
Apparet Canadum tellus, & Virginiai,
Florida, Mexicaque ora, novumque Hispania nomen,
Atque aliæ, atque aliæ sic cultu ut nomine gentes
Regna tenent: dives stat Caliphornia ponto
Insula: non est & reliquas ut dicere post hanc
Jam morer; illa tibi par regnis grandibus extat.
Parte alia oppositum Boreæ qua vergit in Austrum,
Aurea Castellæ regio est, Guianaque latè
Porrigitur; non ulla ferax magis altera tellus
Auro, atque argento; fert omnigenos animantes;
Oppida habet, magnisque extructas molibus urbes.
Adde his Brasiliam, Chilòs quoque, Peruviumque.
Ingentes multique lacus, & ditibus undis
Flumina opima rigant horum spatia ampla locorum.

Dehinc oculos & ad hanc nostræ, quæ dicitur Orbis
Esse vetus, terræ partem circumfer; & Afros,
Europæque, Asiæque immania regna recense.
Prima hominum sedes, atque altrix prima fuisse
Fertur terra ferax Asiæ: his prægrandibus oris,
His populis Reges magni, rerumque Potentes
Imperitant. Vastis regionibus Othmanidarum
Imperium angusto spatium ab Hellesponto.
Quot gentes, quot regna tenet! tum Persidis ingens
Excipit hoc ditio: hinc Indi, Seresque, Scythæque,
Extremique Asiæ Sinæ, gens invia montes
Propter inaccessos, murique crepidine junctos.

Afri-